

*Michael Lampe (AVP)*

## “Ban para hunto pa e progreso di Aruba por continua”

**ORANJESTAD – Esaki tabata e mensahe cu otro candidato hoben di AVP Michael Lampe a expresa diabierna ultimo na momento cu Green Square a habri oficialmente como e area unda hobennan por acudi cerca e candidatonan hoben di AVP. Eynan diferente actividad ta bay tuma luga den e temporada di campaña.**

Diabierna anochi Lampe a cuminsa su discurso bisando: “Awe nochi mi no a subi escenario pa canta pero awe mi ta aki cu boso pa para pa boso deseonan.”

El a corda cu ta casi un siman pasa cu el a wordo lansa y den e siman cu a transcurre, e no por catalog’e otro cu un siman yena cu emocion, yena cu positivismo, yena cu en-

ergia “pa para cu boso p’asina nos sigui bay dilanti”.

Michael Lampe ta conoci como un persona cu ta traha riba tereno di cultura y p’e cultura y educacion ta un base fuerte pa progreso y un cultura bibo ta un cultura cu ta keda educa y innova su mes. “Nos isla Aruba constantemente tin cu keda innova, no solamente a traves di tecnologia, pero tambe con nos ta pensa, e manera con nos ta educa nos mes y con nos ta crece den bida. Awe nochi nos ta para aki hunto, y mi ta sumamente contento pa wak cuanto talento ta subi escenario awe nochi. Un diversidad, rikesa cu ta aporta na nos cultura musical. Riba Aruba nos tin hopi talento y creatividad, profesionalnan hoben cu tin e espirito bibo y futuro ta biba den nan. P’esey



nos kier ta hunto, sigui padilanti cu e progreso, crea oportunidad p’asina nos tur por bay dilanti.”

El a recorda cu tempo cu e tabata bay scol, e ta subi un bus for di Savaneta pa San

Nicolas y awo e ta realiza cu esey tabata e bus di progreso, e transporte pa su futuro, pa su educacion. “Awe ami cu mi team a traha duro. Eytras tin un bus traha cu no tabata wordo uza y awo el a haya un destinacion nobo. Un desti-

nacion pa innova y educa nos cultura. No solamente e ta bay ta mi oficina, pues cualkier momento boso por pasa aki y nos lo t’ey den e bus. Pero tambe e ta un luga unda despues di awe nos tur por bini hunto, combersa y inspira otro. P’esey mes Aruba awe oficialmente nos ta habri e Green Square y riba dje e bus di progreso.”

Pa finalisa su discurso, el a bisa un biaha mas cu e ta para banda di e ciudadanonan di Aruba “paso nos sa cu para hunto, cu nos diferencianan, cu nos deseonan, cu nos soñonan, cu nos amor, cu nos partido AVP, nos ta uni y cla pa sigui cu e progreso di nos pais. P’esey mes mi kier a bisa awe, ami ta Aruba, abo ta Aruba y hunto nos ta Aruba. Hunto nos ta AVP. Green Square. Berd’e ta.”